

आपणो हूँढाड, आपणी संस्करति



साथण

जुलाई सूँ सितम्बर 2022

संपादकः-
पूरण मल बैरवा एवं रामजी लाल बैरवा

सहयोगी:-
मुकेश कुमार योगी एवं कविता योगी

चोखा बच्चार

1. ग्यानी आदमी का सारा गेला खुला छै वै
कडै भी चलजावै, सदाँ वाँको आदर ही
हैवै छै।
2. सई या गलत काई बी भी कोनै, या तो
सोच को खेल छै, पूरी सावकारी सूँ जे
आदमी अपणो जीवन जीवै छै, ऊँसूँ
जादा कोई बडो म्हात्मा कोनै। - लिन
यूतांग
3. जद भी थाँनै हँसबा को मोखो मलै, तो थे
हँसो, या एक बडिया दुवाई छै। - लार्ड
ब्रायन
4. जद्याँ मन भूख लागै छै, तो म्ह खाल्यूँ छ्याँ
अर जद म्ह थक जाऊँ छ्याँ तो, सो जाऊँ
छ्याँ, मूरख म्हारै पै हँसै छै, पण ग्यानी
म्हारी बाताँ समज्या छै। - लिन-ची

चुटकला

दो पडबाळा छोरा

दो पडबाळा छोरा छ्या। रमन अर कमल, एक दन वै स्कूल मै मोडा हैग्या। माझसाब वाँ छोराँ नै पूछ्यो कै थे मोडा कियाँ आया छो। रमन बोल्यो कै, माझसाब मारा च्याराना गुमगा छ्या। म्ह ऊनै हेरबा मै मोडो हैग्यो। कमल नै पूछ्या तो वो बोल्यो, म्ह ईका च्याराना पै पग मेलर खडो छो।



गटर कोड़अ छ

एक भूत की हवेली मै एक दन एक परदेसी आयेडो छो। वो आधी रात मै एक गळी मैर जार्यो छो। ऊनै एक भूत मल्यो तो वो ऊनै बोल्यो, म्ह याँ गळ्याँ मै तीन सो साल सूँ रहयो छ्याँ। वो परदेसी ऊनै बोल्यो फेरतो तनै या भी पतो हैलो की गटर कोडै छै।

लोक गीत

बड़ का पान

बड़ का पान बड़ाबड़ बोले रे।
कुण रण्डवा की नजर पडी म्हारो माथो दुखे
रे॥(टेर)

राताँ ओडी गूदडी रे, लम्बा पसार्या पाँव।
म्हारा मन मै मन मलग्यो रे, बो नहीबतायो
नाँव॥

बड़ का पान बड़ाबड़ बोले रे.....॥(1)
बो पूरो पतो न देग्यो रे, खेलग्यो बो दाव।
बो जातो इतनो खहग्यो रे, गोडबास म्हारो
गाँव॥बड़ का पान बड़ाबड़ बोले
रे.....॥(2)

रसोयाँ मै गोरडी रे, नतकैई रोटी पोती।
छेल भँवर की मन मै आवै, धुवाँ कै मिस
रोती॥

बड़ का पान बड़ाबड़ बोले रे.....॥(3)
बो परेम अस्यो करग्यो रे, रंग मै रंग मल
जाय।

हळदी मै चून मलग्यो रे, जीयाँ लाल रंग हो
जाय॥

बड़ का पान बड़ाबड़ बोले रे.....॥(4)

1. उजाड़ खण्ड मै काळ्यो बाबो हेला पाड़ै॥

उत्तर : अंजन

2. म्ह छूँ छोरी भोळी-ढाळी, हात मै लेबा की लागै चोरी।
बूजैला तो खूँली काँई, माँगैला तो दूँ यूँली काँई॥

उत्तर : ओळा

3. आँकड़-बाँकड़ बेलडी, अर अळ्याँ-गळ्याँ मै रस।
ई पैळी को अरत बता दे, रफ्या दे दूँयूँ दस॥

उत्तर : जलेबी

गुवाकरा

1. अकल कै पाछै लाठी लेर भागबो।
अर्थ = मूर्खतापूर्ण कार्य करना।

वाक्य में प्रयोग :- कालू तो अकल कै पाछै लाठी लेर भागै छै।

2. अकल का घोड़ा दोड़ाबो।

अर्थ = बुद्धि से कार्य करना।

वाक्य में प्रयोग :- मदन तो हर काम मै अकल का घोड़ा दोड़ावै छै।

3. अंग न लागबो।

अर्थ = खा-पीकर भी मोटा न होना।

वाक्य में प्रयोग :- अतरो खायाँ पाछै भी, ई छोरा कै तो काँई भी अंग न लागै।

ऊन्दरो अर एक खाती

एक बार की बात छै, ऊन्दरा कबड्डी खेलर्या छा, तो उण्डै एक ऊन्दरो आयो अर बोल्यो, बायेला-बायेलाओ मन भी कबड्डी खलाओ। बायेला बोल्या, म्हे तन कोनै खलावाँ बायेला थारी पूँछ लम्बी छा। पहली थारी पूँछ कटार आ। ऊन्दरो भाग्यो-भाग्यो खाती कन गियो। खाती-खाती मारी पूँछ काट नही तो थारी छोडी लेर भागूँ छूँ। खाती ऊँकी पूँछ काट दियो। ऊन्दरो उल्टोई बायेला कन गियो। बायेला-बायेलाओ मन अब खलाल्यो, म्ह महारी पूँछ कटायायो। नही बायेला थारी पूँछ का लोईलागै छै। थारी पूँछ नै उल्टो जुड़वार आ। ऊन्दरो उल्टो खाती कन गियो। खाती-खाती महारी पूँछ नै उल्टो जोड़, नही तो थारी छोडी लेर भागूँ छूँ। ऊन्दरो ऊँकी छोडी नै लेर आग्यो। थोड़ो आगै गियो तो ऊनै एक डोकरी मली वा डोकरी बाल उपाड़-उपाड़र रोट्याँ सेकरी छी। ऊन्दरो ऊनै बोल्यो कै डोकरी रोटी को मण्डक्यो देवै तो, तनै छोडी तो म्ह देद्यूलो। डोकरी राजी हैगी। ऊनै रोटी को मण्डक्यो देदी। ऊन्दरो थोड़ो आगै गियो तो ऊनै एक ओर डोकरी मली। वा डोकरी छाछ कर्री छी अर बाल उपाड़-उपाड़र खारी छी। ऊन्दरो डोकरी नै बोल्यो, कै डोकरी तोनै रोटी को मण्डक्यो तो म्ह देद्यूलो, पण तू मन धी को लपट्यो देवै, तो डोकरी राजी हैगी। डोकरी ऊनै धी को लपट्यो देदी। ऊन्दरो थोड़ो आगै गियो तो ऊनै गुवाळ्या मल्या सारा गुवाळ्या तो चोपड़ी रोटी खार्यो छा पण एक गुवाळ्यो कोरी रोटी खार्यो छो, तो ऊन्दरो ऊँ गुवाळ्या नै बोल्यो, कै धी को लपट्यो तो तोनै म्ह देद्यूलो पण मह थारी एक छेली लेऊलो, गुवाळ्यो राजी हैग्यो, गुवाळ्यो धी का लपट्या सूँ रोट्या चोपड़ अर खार मजासूँ सोग्यो।